



UMP, PKNP turun padang anjur Seminar Transformasi Masyarakat dan Motivasi Pelajar



Buat julung kalinya, Universiti Malaysia Pahang (UMP) dengan kerjasama Perbadanan Kemajuan Negeri Pahang (PKNP), turun padang dengan menganjurkan program Seminar Motivasi Pelajar sempena Majlis Pelancaran Program Amanah PKNP pada 5 Mac 2013 yang lalu.

Program sehari itu dirasmikan oleh Menteri Besar Pahang, Yang Amat Berhormat Dato' Sri Diraja Haji Adnan Haji Yaakob di Kompleks Dagangan Mahkota, Indera Mahkota Kuantan.

Katanya, program kemasyarakatan ini merupakan sebahagian daripada aktiviti dan keperluan PKNP dan UMP untuk memenuhi tanggungjawab sosial khususnya dalam melaksanakan agenda pembangunan sosioekonomi negeri ini.

"PKNP juga mengucapkan terima kasih kepada UMP atas kerjasama ini dalam usaha untuk menambahbaik kehidupan dan kesejahteraan penduduk serta mengadakan program-program pendidikan dan motivasi untuk masyarakat setempat," katanya.

Adnan berkata demikian di hadapan kira-kira 1,000 tetamu yang hadir. Teks ucapan beliau dibacakan oleh Ketua Eksekutif PKNP,

Dato' Haji Lias Mohd Noor.

Program ini turut melibatkan 11 buah kampung sekitar negeri Pahang iaitu Kampung Pagi, Jerantut, Kampung Sungai Temau, Lipis, Kampung Cherok Paloh, Kuantan, Kampung Sungai Miang, Pekan, Kampung Tanjung Agas, Pekan, Kampung Pasir Panjang, Pekan, Kampung Lubuk Paku, Maran, Kampung Ganchong Hulu, Pekan, Kampung Ganchong Tengah, Pekan, Kampung Tanjung Batu, Pekan dan Kampung Kiambang, Pekan.

Turut hadir Ahli Dewan Undangan Negeri (ADUN), Indera Mahkota, Yang Berhormat Dato' Phang Tsu Ming, Timbalan Ketua Setiausaha Kerajaan (Pengurusan), Dato' Mohamad Ridzwan Mohd Tahar, Penasihat Undang-undang Negeri Pahang, Dato' Mat Zara'ai Alias dan Dekan Pusat Bahasa Moden & Sains Kemanusiaan (PBMSK), UMP, Profesor Dr. Abd. Jalil Borham.

Dalam pada masa yang sama, lebih 300 peserta daripada semua kampung menyertai Seminar Transformasi Masyarakat Negeri Pahang yang dikendalikan oleh pensyarah UMP.

Sebanyak tiga kertas kerja telah

dibentangkan oleh pensyarah PBMSK, Imaduddin Abidin yang bertajuk "Transformasi Belia", Pengarah Pusat Keusahawanan, Dr. Omar Jamaludin bertajuk "Transformasi Ekonomi dan Keusahawanan", dan kertas kerja oleh Profesor Dr. Abd. Jalil Borham yang bertajuk "Transformasi Modal Insan".

Manakala bagi program Seminar Motivasi Pelajar pula disampaikan oleh pensyarah PBMSK, Tuan Sidek Tuan Muda bertajuk "Akinnah - Model Pengurusan Hati", "Study Orientation Skills (SOS)" oleh pensyarah PBMSK, Profesor Madya Dr. Mohd Ghani Awang, "Kaunseling dan Kerjaya Pelajar" oleh Pegawai Psikologi Kanan, Paridah Mohd Ali dan "Spell It Right (S.I.R)" oleh pensyarah PBMSK, Dr. Hafizoah Kassim.

Seminar ini melibatkan hampir 300 pelajar dari daerah Pekan iaitu Sekolah Menengah Agama Ganchong, Sekolah Menengah Kebangsaan Pekan dan Sekolah Menengah Kebangsaan Ubai.

Selain itu, program juga diserikan dengan ekspo pameran oleh kampung-kampung terlibat yang mempamerkan produk-produk hasil keluaran kampung masing-masing dan pameran pendidikan oleh UMP.